

Sejmikarjo maja wo swojich aktiwitach rěčeć



Na přenje lěto skutkowanja Serbskeho sejma zhladowachu wčera na zarjadowanju w Njebjelčicach.
Foto: Feliks Haza

Njebjelčicy (SN/MiR). Něšto dlěje hač lěto Serbski sejm mjeztym wobsteji, skonstituowany 17. nowembra 2018 w Slepom. Iniciatoram je wón přenje demokratiske zastupnistwo Serbow. Jeho 24 zapóslancow stara so wot toho časa wo zajimy Serbow w Hornjej, srjedźnej a Delnjej Łužicy. Džěl z nich bě wčera do Njebjelčic přijěl, zo bychu zhromadnje lětničku swječili. Něhdže 40 ludži – zapóslancy, sympatizanca a dalši zajimcy – słyšeše spočatnje na gmejnskej žurli přednošk dr. Měrcina Wałdy. Wón zaběraše so z prašenjom, čehodla Serbja swój sejm trjebaja, a spominaše na spočatki zjawneje diskusije wo zastupnistwje Serbow jako korporacija zjawneho prawa. „Zo so němska politika tak mało wo hódnoty fungowaceje demokratije w Serbach starosći, je ćmowa perspektiwa.“ Hajko Kozel rozprawješe po tym wo zaměrje sejma, sobu- a samopostajowanje serbskeho ludu pohonjeć a namakać konsens mjez sejmom a Domowinu.

Mjez druhim skedźbni Kozel na to, zo „je narodna organizacija Serbow Domowina mnohe jednanske namjety ze Serbskeho sejma přewzała, na přikład, zo štyrjoch kandidatow za wólby Rady za serbske naležnosće nominuje. Tak móža Serbja sami wuslědk wólbow bóle postajeć.

Měrcin Krawc poda wid do přichoda. Tak chcedža wuwic strukturnu strategisku papjeru, za což budu so sejmikarjo nawodow serbskich institucijow naprašować. Planowane su tež džělarnički z ekspertami a rozmołwy z ludnosću. Kaž naslědna diskusija pokaza, „dyrbja sejmikarjo wjace wo swojich aktiwitach rěčeć. Budźće zmužičiši“, Marko Čornak namołwi. Planowany je tež dalši kubłanski wjeršk, připowědźi nowinska rěčnica Jadwiga Pjacec. Do toho saha zaměr, wutworić w Njebjelčicach serbsku zakładnu šulu.